



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 144, datë 02.12.2019

**PËR PËRFUNDIMIN E PROCEDURËS SË VERIFIKIMIT, VLERËSIMIT,
PIKËZIMIT DHE RENDITJES SË KANDIDATURËS SË ZONJËS MARSIDA
XHAFERLLARI, PËR SHKAK TË TËRHEQJES NGA KANDIDIMI PËR
INSPEKTOR I LARTË I DREJTËSISË**

Këshilli i Emërimeve në Drejtësi, i përbërë nga :

Ardian Dvorani	- Kryetar
Vitore Tusha	- Zëvendëskryetare
Margarita Buhali	- Anëtare/Relatore
Fatjona Memçaj	- Anëtare
Fatri Islamaj	- Anëtar
Eriol Roshi	- Anëtar

Asistuar nga sekretare **Dorina Dulaj**,

Me praninë e Avokates së Popullit, **zonjës Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,
Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:
- **zotit Bledar Dervishaj**, përfaqësuesit i autorizuar i Presidentit të Republikës,

në mbledhjen e datës **02.12.2019**, mori në shqyrtim çështjen që i përket:

**KANDIDATJA PËR INSPEKTOR
I LARTË I DREJTËSISË:**

Zonja Marsida Xhaferllari

OBJEKTI:

**Tërheqje nga kandidimi për Inspektor i
Lartë i Drejtësisë.**

KËSHILLI I EMËRIMEVE NË DREJTËSI

Pasi dëgjoji relatimin e anëtares së Këshillit, **zonjës Margarita Buhali**, mendimin e paraqitur nga Avokati i Popullit, **zonja Erinda Ballanca**, në cilësinë e vëzhgueses së përhershme në

mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatës, dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 147/d të Kushtetutës dhe të nenit 199 dhe 229 të Ligjit nr. 115/2016 *“Për organet e qeverisjes së sistemit të drejtësisë”*, Këshilli i Emërimeve në Drejtësi, në datën 01.03.2019, ka shpallur hapjen e procedurës së aplikimeve për vendin vakant për Inspektor i Lartë i Drejtësisë.

2. Në përfundim të procedurës së aplikimeve për shprehjen e interesit për kandidim, Këshilli i Emërimeve në Drejtësi ka filluar shqyrtimin e aplikimeve të kandidatëve të shoqëruara me dokumentet e paraqitura prej tyre për përmbushjen e kushteve dhe kritereve ligjore të përcaktuara në nenin 199 të ligjit nr. 115/2016 *“Për organet e qeverisjes së sistemit të drejtësisë”*.

3. Ndërmjet kandidatëve që kanë shprehur interesin për plotësimin e këtij vendi vakant për Inspektor i Lartë i Drejtësisë, është edhe zonja Marsida Xhaferllari.

4. Në zbatim të nenit 147/d dhe 149/d të Kushtetutës dhe të nenit 199, 229, 235 e vijues të Ligjit nr. 115/2016 *“Për organet e qeverisjes së sistemit të drejtësisë”*, si edhe të pikës 98 të aktit nënligjor normativ, Vendimi i Këshillit të Emërimeve në Drejtësi me nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Këshilli i Emërimeve në Drejtësi, në mbledhjen e zhvilluar në datën 05.04.2019, vendosi fillimin e procedurave të verifikimit, vlerësimit, pikëzimit dhe renditjes të kandidatëve që kanë shprehur interesin për vendin vakant për Inspektor i Lartë i Drejtësisë.

5. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2 datë 15.02.2019 *“Për procedurën e shortit të caktimit të relatorëve për pozicionet vakante në çdo institucion”*, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, në të njëjtën ditë të mbledhjes së zhvilluar në datën 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.

6. Sipas rezultatit të shortit manual të realizuar nga Këshilli i Emërimeve në Drejtësi, lidhur me zgjedhjen e Inspektorit të Lartë të Drejtësisë, të shpallur nga Këshilli i Emërimeve në Drejtësi në datën 01.03.2019, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, zonja Margarita Buhali.

7. Zonja Marsida Xhaferllari, si një ndër kandidatët që ka shprehur interesin për vendin vakant të sipërcituar për Inspektor i Lartë i Drejtësisë, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të*

Drejtësisë”, është njoftuar me shkrim për tu paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidatja Marsida Xhaferllari, gjendet e administruar në dosjen e kandidatës.

8. Në datën 10.04.2019, kandidatja Marsida Xhaferllari është paraqitur pranë Këshillit të Emërimeve në Drejtësi dhe është pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së saj. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen e kandidatës.

9. Në datën 15.04.2019, kandidatja Marsida Xhaferllari ka depozituar në sekretarinë e Këshillit të Emërimeve në Drejtësi formularë të deklarimit dhe autorizimet përkatëse për qëllimet e vijimit të procedurës së verifikimit të kandidaturës së saj, të cilat gjenden të administruara në dosjen e kandidatës.

10. Këshilli i Emërimeve në Drejtësi me vendimin nr. 110, datë 06.08.2019 ka vendosur:

“1. Lejimin e kandidimit të kandidatës Marsida Xhaferllari, në vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019....”.

11. Kandidatja Marsida Xhaferllari, me emalin e datës 15.11.2019, ka dërguar pranë Këshillit të Emërimeve në Drejtësi (depozituar pranë KED me nr. 785 prot, datë 18.11.2019), kërkesë për tërheqje nga kandidimi për Inspektor i Lartë i Drejtësisë, në të cilën parashtrohet:

Unë, e nënshkruara Marsida Xhaferllari, me anë të kësaj kërkesë deklaroj me vullnetin tim të plotë dhe të lirë tërheqjen e kandidimit (heqjen dorë) tim, që kam depozituar për shqyrtim në Këshillin për Emërime në Drejtësi për pozicionin e Inspektorit të Lartë të Drejtësisë, pasi interesi im i ligjshëm tashmë nuk ekziston më.

Siç duhet të jeni në dijeni, me dekretin nr. 11350, datë 13.11.2019 të Presidentit të Republikës, jam emëruar në detyrën e gjyqtarës së Gjykatës Kushtetuese, si dhe kam kryer procedurën e betimit përpara Presidentit të Republikës në datën 14.11.2019. Kjo detyrë e rëndësishme publike më detyron të fokusohem në përgjegjësi të reja, me një nivel të ri përkushtimi dhe serioziteti.

12. Në zbatim të pikës 31 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, anëtari i Këshillit relator për ndjekjen e procedurave për vendin vakant për Inspektor i Lartë i Drejtësisë të shpallur nga Këshilli i Emërimeve në Drejtësi në datën 01.03.2019, ka njoftuar Këshillin lidhur me vullnetin e shprehur nga kandidatja Marsida Xhaferllari për tërheqjen nga kandidimi për këtë vend vakant, duke përgatitur dhe dërguar për shqyrtim relacionin dhe projekt-aktin përkatës mbi përfundimin e procedurës administrative të verifikimit dhe vlerësimit të kësaj kandidateje.

13. Në zbatim të pikës 33 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Kryetari ka thirrur mbledhjen e Këshillit duke njoftuar anëtarët për zhvillimin e saj në datën 02.12.2019, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë

edhe çështja me objekt përfundimin e procedurës së verifikimit, vlerësimit, pikëzimit dhe renditjes së kandidaturës së zonjës Marsida Xhaferllari, për shkak të tërheqjes nga kandidimi për vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019.

14. I njëjti njoftim, së bashku me materialet e çështjes i janë dërguar edhe Avokatit të Popullit.

15. Për zhvillimin e mbledhjes së Këshillit në datën 02.12.2019 dhe rendin e ditës janë njoftuar edhe subjektet që sipas ligjit ftohen të marrin pjesë në mbledhjet e Këshillit.

16. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidatës.

17. Në thelb, Avokati i Popullit parashtroi se: Vullneti i kandidatës Marsida Xhaferllari është i qartë.

II. Vlerësimi i Këshillit të Emërimeve në Drejtësi

18. Këshilli i Emërimeve në Drejtësi, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga anëtari i Këshillit relator i caktuar për ndjekjen e procedurave për vendin vakant për Inspektor i Lartë i Drejtësisë të shpallur nga Këshilli i Emërimeve në Drejtësi në datën 01.03.2019, vlerëson se duhet të procedojë me vendim për përfundimin e procedurës së verifikimit, vlerësimit, pikëzimit dhe renditjes së kandidatës Marsida Xhaferllari.

19. Në pikën 1 të nenit 201 të Ligjit nr. 115/2016 *“Për organet e qeverisjes së sistemit të drejtësisë”* parashikohet se:

“1. Inspektori i Lartë i Drejtësisë zgjidhet nga Kuvendi nga radhët e kandidatëve të përzgjedhur dhe të renditur nga Këshilli për Emërimet në Drejtësi”.

20. Në zbatim të nenit 147/d të Kushtetutës dhe të nenit 199 dhe 229 të Ligjit nr. 115/2016 *“Për organet e qeverisjes së sistemit të drejtësisë”*, në përfundimit të afatit të caktuar të shpalljes *“Për hapjen e Procedurës së Aplikimit në Pozicionin Vakant Inspektor i Lartë i Drejtësisë”*, Këshilli i Emërimeve në Drejtësi, pasi ka administruar dokumentacionin e kandidatëve që kanë shprehur interes për këtë pozicion, ka filluar në datën 05.04.2019 procedurën e verifikimit të kandidaturave për plotësimin e kushteve dhe kriterëve të kandidimit që parashikohen nga Kushtetuta dhe ligji.

21. Ligji nr. 115/2016 nuk parashikon në mënyrë të shprehur rastin e tërheqjes nga kandidimi dhe mënyrën e disponimit të Këshillit të Emërimeve në Drejtësi në raste të tilla.

22. Por, nga ana tjetër, Ligji nr. 115/2016, në pikën 2 të nenit 229, parashikon se :

“2. Këshilli i Emërimeve në Drejtësi, për të siguruar zhvillimin e një procedure transparente, publike dhe bazuar në merita, me vendim, miraton rregulla më të detajuara për përzgjedhjen

dhe pikëzimin e kandidatëve, duke përfshirë edhe rregullat për procedurën e verifikimit të pasurisë, integritetit dhe të së shkuarës profesionale dhe personale të tyre.”

23. Bazuar në këtë detyrim dhe delegim ligjor për të miratuar, në bazë dhe për zbatim të ligjit, rregulla më të detajuara normative, Këshilli i Emërimeve në Drejtësi ka nxjerrë aktin nënligjor normativ, vendimin nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*.

24. Në lidhje me rastin e tërheqjes nga kandidimi, në vendimin nr. 4, datë 11.03.2019 të Këshillit të Emërimeve në Drejtësi, në pikat 8 dhe 31 të tij, parashikohet se :

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.”

“31. Kur kandidati njofton tërheqjen nga kandidimi, relatori përgatit relacionin që përshkruan procedurën e zhvilluar dhe projektaktin mbi përfundimin e procedurës administrative të verifikimit të kandidatit të tërhequr, duke e dërguar menjëherë për shqyrtim në mbledhjen e Këshillit.”

25. Këshilli i Emërimeve në Drejtësi, në zbatim të drejtë të dispozitave ligjore dhe atyre nënligjore normative të zbatueshme në rastin e tërheqjes nga kandidimi, vlerëson të rregullt procedurën e ndjekur deri tani për verifikimin e kandidaturës së kandidates Marsida Xhaferllari. Kandidatja është njoftuar rregullisht për fillimin e kësaj procedure dhe është paraqitur në datë 10.04.2019 pranë zyrave të Këshillit duke u pajisur me formularët e deklarimeve dhe të autorizimeve e deklaratave. Gjithashtu, në datën 15.04.2019, kjo kandidatje i ka depozituar të nënshkruara rregullisht deklaratat dhe autorizimet për vijimin e procedurës së verifikimit të kandidaturës.

26. Këshilli i Emërimeve në Drejtësi me vendimin nr. 110, datë 06.08.2019 ka vendosur:

“1. Lejimin e kandidimit të kandidates Marsida Xhaferllari, në vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019....”

27. Nga aktet që përmban dosja e kandidimit, rezulton që kandidatja Marsida Xhaferllari, në datën 15.11.2019, i ka njoftuar me shkresë Këshillit vullnetin e saj për tërheqjen nga kandidimi për vendin vakant për Inspektor i Lartë i Drejtësisë. Ky njoftim gjendet në dosjen e kandidimit dhe një kopje i bashkëlidhet këtij vendimi. Kandidatja në kërkesën për tërheqje nga kandidimi për Inspektor i Lartë i Drejtësisë, parashtron:

Unë, e nënshkruara Marsida Xhaferllari, me anë të kësaj kërkesë deklaroj me vullnetin tim të plotë dhe të lirë tërheqjen e kandidimit (heqjen dorë) tim, që kam depozituar për shqyrtim në Këshillin për Emërime në Drejtësi për pozicionin e Inspektorit të Lartë të Drejtësisë, pasi interesi im i ligjshëm tashmë nuk ekziston më.

Siç duhet të jeni në dijeni, me dekretin nr. 11350, datë 13.11.2019 të Presidentit të Republikës, jam emëruar në detyrën e gjyqtarës së Gjykatës Kushtetuese, si dhe kam kryer

procedurën e betimit përpara Presidentit të Republikës në datën 14.11.2019. Kjo detyrë e rëndësishme publike më detyron të fokusohem në përgjegjësi të reja, me një nivel të ri përkushtimi dhe serioziteti.

28. Këshilli vlerëson të rregullt në aspektin e qartësisë së vullnetit të shprehur prej kësaj kandidate për tërheqjen nga kandidimi, kërkesën e paraqitur për këtë qëllim nga kandidatja Marsida Xhaferllari.

29. Këshilli vlerëson që shprehja e interesit dhe kandidimi për plotësimin e vendeve vakante që krijohen për Inspektor të Lartë të Drejtësisë është një e drejtë, e cila ushtrohet nga kandidatët ekskluzivisht mbi vullnetin individual të tyre, duke respektuar procedurat, kushtet dhe kriteret e kandidimit që parashikon Kushtetuta dhe ligji.

30. Në rast se personi që kandidon, në çdo kohë e gjendje të procedimit, shpreh vullnetin për të mos vijuar më tej me kandidimin për plotësimin e vendit vakant që krijohet për Inspektor të Lartë të Drejtësisë, atëherë nuk ka më vend të vijojnë procedurat e verifikimit, vlerësimit, pikëzimit dhe renditjes së kandidaturës, të parashikuara nga ligji dhe aktet nënligjore të nxjerra në bazë e për zbatim të tyre.

PËR KËTO ARSYE:

Në mbështetje të pikës 1 të nenit 149/d të Kushtetutës, të pikës 3 të nenit 229 të Ligjit nr. 115/2016 “Për organet e qeverisjes së sistemit të drejtësisë”, si edhe të pikave 8 dhe 31 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Përfundimin e procedurës së verifikimit, vlerësimit, pikëzimit dhe renditjes së kandidaturës së zonjës Marsida Xhaferllari, për shkak të tërheqjes nga kandidimi për vendin vakant për Inspektor i Lartë të Drejtësisë, të shpallur nga Këshilli i Emërimeve në Drejtësi në datën 01.03.2019.

2. Në zbatim të nenit 238 të Ligjit nr. 115/2016, ky vendim i njoftohet kandidates Marsida Xhaferllari.

3. Kandidatja Marsida Xhaferllari, ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.

4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETARI

Ardian DVORANI

